





8033

B. MARTIN REL









DECLARATION

DV ROY CONFIR-

MATIVE D'AVTRE DECLARATION par luy faicte à son aduenement à la Couronne, de vouloir maintenir & conseruer la Religion Catholique , Apostolique & Romaine. Et Arrest de la Cour de Parlement intereuenu sur icelle.



*Cadret de l'edition de
l'ann. 1544. fol. 387
de la Legation f. 387*

A T O U R S,

Chez I A M E T M E T T A Y E R, Imprimeur
ordinaire du Roy.

M. D. X C I.

A V E C P R I V I L E G E D Y D I T S E I G N E Y R.

MANUSCRIPTS

ALFRED C. ...

Case

... F ...


... 39 ...

... 326 ...

...

1591 Fra

THE NEWBERRY
LIBRARY



DECLARATION DU
ROY CONFIRMATIVE
*d'autre Declaration par luy faicte
à son aduenement à la Couronne, de
vouloir maintenir & conseruer la
Religion Catholique, Apostolique
& Romaine.*

HENRY PAR LA
GRACE DE DIEV,
ROY DE FRANCE
ET DE NAVARRE,
A tous ceux qui ces presentes let-
tres verront, Salut: Comme nous
auons Dieu pour Iuge de noz in-
tentions, aussi estimōs nous auoir
assez iustifié au monde que noz
desseings, tous noz deportemens,
A ij

& ces violens labeurs que nous auons depuis nostre premier aage supportez sans intermission, n'ot jamais tendu qu'à l'establissement d'une bonne & perdurable paix en ce Royaume, par laquelle bien que nous ayons esperé remettre le repos, la splendeur, & l'opulence, qui par la continuation des guerres ciuilles s'y estoient perdues & deperies. Toutesfois ce a principalemēt tousiours esté pour le desir de veoir assouppiz & estaincts les scismes & diuisions qui ont de long temps trauaillé l'Eglise & cest Estat : ayās tousiours eu ceste ferme creance que le soin du repos des consciences ne precede pas seulement, mais donne la loy, forme & compose celle de toutes les autres fortunes tempo-

relles. C'est ardent desir que nous
en auons cy deuant porté premie-
rement comme Prince Chrestié,
& soigneux par bonnes œuures
d'en meriter le tiltre, & puis pour
le rang que nous auons tousiours
tenu en ce Royaume, & l'intereſt
que nous auons à la conseruation
de ce qui est de la dignité d'iceluy,
s'est en nous augmenté & acereu
autant qu'il est comprehensible,
depuis que par le funeste accidēt
de la perte du feu Roy dernier,
nostre tres-honoré Seigneur &
frere, il a pleu à Dieu par le droict
de legitime succession, nous ap-
peller à ceste Couronne, & que
nous nous sommes sentiz char-
gez & responsables de la conser-
uation de tant de peuples, & avec
pouuoir & authorité d'ordonner

nous mesmes de ce que auparavant nous ne pouuions que interceder enuers les autres. Ce fut aussi le premier acte que nous voulusmes faire en ceste dignité souveraine, que de declarer solennellement que nous ne desirons rien tant que la conuocatiō d'un saint & libre Cōcile, par lequel ce qu'il y a de different & discordant au faict de la religion, peust estre si bien esclaircy & vuidé, qu'il ne peust iamais plus estre en aucune dispute & incertitude, & que pour nostre particulier, nous ne portions nulle opiniastrété ou presumption de science ou doctrine: Que nostre intentiō estoit de receuoir plus volontiers que iamais toute bonne instruction qui nous pourroit estre donnee. Et si

par icelle, Dieu nous faisoit la grace de recognoistre si nous sommes en erreur, de nous en departir, & nous reduire à ce qu'il permettra que nous voyons & iugions estre de nostre salut, & de ses commandemens. Ayant cependant iuré & promis que nous ne changerions ou innouerions ny ne souffririons estre rien changé ou innoué, au faict & exercice de la Religiō Catholique, Apostolique & Romaine, laquelle nous voulions cōseruer & maintenir, & ceux qui font profession d'icelle, en toutes leurs authoritez, franchises & libertez. Comme il est plus particulierement porté par l'acte de ladite declaration signée de nous, & qui a esté veüe & registree en toutes noz Courts de

Parlemens. Ce que ayant esté ainsi commun & notoire à vn chacun, deuoit suffire pour amortir & esteindre ceste guerre de rebelliō, si le pretexte qu'en ont prins les auteurs d'icelle eust esté veritable, & qu'il fust (comme ils le publient) sur le fait de la religion: pour le bien de laquelle la conuocation dudit Concile, & nostre submissiō particuliere à vne nouvelle instructiō, estoit le meilleur acheminement qui s'y pouuoit desirer. Mais eux qui craignent & abhorrent le plus, ce qu'ils veulent persuader de desirer le mieux, qui fuyent la lumiere pour demourer dans les tenebres, lesquelles tiennent en protectiō les fautes & les crimes, pressez de leurs consciences, qui leur en sont autant de Iuges

ges irreprochables, ayans plus de
 loing de se parer contre la iustice
 des hommes, que contre celle de
 Dieu, quād ils ont veu plus de dis-
 position à l'ordre, c'est lors qu'ils
 se sont precipitez en la plus gran-
 de confusion, & par leurs seuls de-
 portemens, ils se sont eux mesmes
 conuaincuz, comme malicieuse-
 mēt ils ont abulé d'un saint nom
 de Religion, pour couvrir leur in-
 satiable ambition. Les premiers
 mouuemens, & le temps de leur
 souzleuation le manifestent assez,
 s'estans rebellez sous le nom &
 pretexte de ladite Religion con-
 tre le feu Roy nostredit tres-ho-
 noré seigneur & frere, qui a touf-
 iours esté tres-catholique, & lors
 que plus il faisoit la guerre pour
 ladite Religion Catholique, la

continuation de leurs procédures
 a tousiours depuis confirmé le
 premier iugement que l'on en a
 deu faire, tāt que sans qu'il ait esté
 besoin de plus particuliere infor-
 mation, ils ont d'eux mesmes si
 clairement descouuert leur des-
 feing, qu'il n'y a si simple qui ne
 voye que le faict de la Religion
 dont ils s'arment le plus, c'est de-
 quoy il s'y agist le moins. Les li-
 gues & associations qu'ils ont fai-
 tes pour l'inuasion de ce Royau-
 me, avec le Roy d'Espagne, les
 Ducs de Sauoye, & de Lorraine,
 le partaige de toute l'vsurpation
 faite & à faire qui en est conclud
 entre eux, tesmoignent assez que
 ce trouble n'est qu'une faction
 d'Estat, & qu'ils ne tiennent ceste
 guerre qu'en trafficq & commer-

ce, & pour y proffiter seulement. Ce n'est plus aussi que envers les plus simples, & ceux lesquels ils veulent associer en la despence seulement, & non au proffit qu'ils en esperēt, qu'ils font valloir leurs pretextes, comme ils ont fait à l'ēdroict des derniers Papes, pour leur faire cherement payer le tiltre imaginaire, qu'ils leur proposent, de Chefs & superieurs en ceste cause. Mais ceste leur malice fust bien tost descouuerte, par le feu Pape Sixte que l'on a veu en ses derniers iours, se repētant d'auoir esté par eux abusé, bien resolu de fulminer contre eux plus rigoureusement que à leur instigation, il n'auoit auparauant faict contre d'autres. Ils ont depuis acquis en ceste dignité vn subiect

pour eux plus conuenable : pour le moins iusques icy sa trop facile credulité, & la violente & precipitee condemnation qu'il a faicte contre ceux qui n'ont esté ouyz ny deffenduz, faict presumer qu'il soit plustost partial en ceste cause que pere commun, & egal à tous tel qu'il deuroit estre. Ayans esté aduertiz que sur la simple declaration qui luy a esté faite de la part desdicts Rebelles, que nous auons coniuré cōtre la Religion Catholique : que nous en reietton toute instruction, il nous a tenuz pour incapables d'icelle, & par vn Nunce enuoyé expres, il a fait ietter des Monitoires en aucunes Villes de ce Royaume contre les Princes, les Cardinaux & Officiers de la Couronne, Archeuef-

ques, Euesques, Prelats & tous autres, tant du Clergé, de la Noblesse que du tiers Estat, qui sont à nostre seruice, & nous ont gardé la fidelité & obeissance que naturellement ils nous doiuent: Estant ledit Nūce entré en cestuy nostre Royaume, sans nostre congé & permission, ny nous auoir donné aucun aduis de son voyage, ny de sa charge: S'estant au contraire adressé ausdits ennemis & aux Villes que ils vsurpent, pour y receuoir d'eux les instructions de ce qu'ils voudroyent qu'il fist, comme estant plus leur Ministre que de celuy de qui il est enuoyé. En quoy nous recognoissons auoir à rendre grandes graces à Dieu, de ce qu'il a permis que nosdicts ennemis Rebelles soient reduits à ceste necessité,

que leurs plus fortes raisons, & sur lesquelles sont fondees leurs principales inductions se puissent si aisement conuaincre de fausseté, & recognoistre pour impostures & calomnies, comme ils n'en pouuoient alleguer vne plus grande, que d'imposer que nous reiettons l'instruction que nous auons promis de receuoir, laquelle au contraire nous recherchôs & desirôs, avec entiere affection, & l'aurions desia receüe sans l'exercice violent & cōtinuel, auquel les affaires que nous donnent lesdicts Rebelles, nous tiennent, sans y auoir encore eu vn seul iour d'intermission & de repos. Et l'autre n'est pas moindre, de dire que nous ayons rien innoüé ou alteré au faict de la Religion Catholique, Apostolique & Ro-

maine. Dequoy nous les voulons bien tous pour tesmoins, s'ils peuvent remarquer que nous ayons souffert ou permis depuis nostre aduenemēt à ceste Courōne, qu'il y ait esté attenté aucune chose. La seule disposition aussi du Gōuuernement de cet Estat les peut conuaincre de fauceté, estans les Princes de nostre sang, les Officiers de la Couronne, les Gōuuerneurs & Lieutenans generaux de nos Provinces, nos principaux Conseillers & Ministres, & ceux qui manient & expedient nos plus importants affaires, tous de la Religion Catholique, ayant en nostre Conseil d'Estat les Cardinaux & principaux Prelats de ce Royaume: nos Parlemens tous remplis d'Officiers Catholiques, qui sont avec la conui-

ction de leurs impostures, toutes
 bonnes & suffisantes cautions de
 l'accomplissement de la promesse
 que nous auons faicte, pour la con-
 seruation & manutention de ladi-
 cte Religion Catholique, Aposto-
 lique & Romaine, laquelle desirât
 inuiolablement effectuer, & à ce
 que tous nos bōs & fideles subiects
 Catholiques en soient bien infor-
 mez & asseurez, **N O V S D E C L A -**
R O N S de rechef par ces presentes
 & conformément à nostre prece-
 dente Declaration; Protestons de-
 uant le Dieu viuant, que nous ne
 desirons rien tant que la Conuo-
 cation d'un saint & libre Concile,
 ou quelque assemblée notable suf-
 fisante, pour decider les differents
 qui sont au faict de la Religion,
 pour laquelle nous receurōs tous-
 iours

iours en nostre particulier toute
bonne instruction, ne reclamant
rien tant de sa diuine bonté, sinon
qu'il nous fasse la grace, si nous
sommes en erreur, de le nous faire
reconoistre, pour nous reduire
au plustost à la meilleure forme:
n'ayant autre plus grande ambi-
tion que de voir, de nostre Regne,
Dieu seruy vnanimement de tous nos
subiets selon sa loy & commande-
ment: & ainsi, que la France soit
toufiours l'asseurâce du nom Chre-
stien: & en nous se conserue aussi
legitimement ce tiltre, qu'en au-
cun autre de nos predecesseurs:
Promettons ce pendant & iurons,
de vouloir conseruer la Religion
Catholique, Apostolique & Ro-
maine, & tout exercice d'icelle en
toutes ses auctoritez & priuileges,

sans souffrir qu'il y soit rien changé, alteré ou attenté, aussi peu que nous souffririons qu'il fust fait à nostre propre personne, selon que il est plus amplement porté par nostredicte precedēte declaration, laquelle nous auons de nouveau cōfirmée, approuuée & ratifiée, cōfirmons, approuuons & ratifions par ces presentes. Et pour le regard de l'entreprinse faicte par ledict Nunce, combien que les fautes qui sont en la cause, au iugement & en l'execution qui en a esté faite, soiēt telles & si euidentes qu'elles rendēt toute la procedure nulle & de nul effect & valeur, toutesfois parce que cela regarde non seulement nostre personne, & ceux qui y sont à present interessez, mais aussi noz successeurs & les Dignitez & Au-

toritez de cet Estat, ne voulans que de nostre Regne, il y soit rien atté-
té & entrepris, ny aussi peu que nostre nom ait peu seruir d'y faire aucun preiudice: Reconnoissant aussi que les libertez de l'Eglise Gallicane y peuuent estre interefees, à la protection & conseruatiō desquelles nous nous sentōs particulièrement obliger, par nostre susdicte promesse, comme à chose dependante du faict & de la Dignité des Ecclesiastiques de ce Royaume: Nous voulons que cela soit publiquemēt réparé; mais sans y rien prononcer de nostre seule auctorité, Nous auons resolu de remettre tout ce faict à la iustice ordinaire pour y proceder selon les loix & Coustumes du Royaume; la garde & conseruation desquel-

les appartenant naturellement à nos Cours de Parlement, nous leur en auons delaisié & remis toute la iurisdiction & congnoissance. A CES CAUSES, Nous mandons & enioignons aux Gens tenans nosdictes Cours de Parlement, que ils ayent, incontinent ces presentes receuës, & sans intermission & delay, à proceder cōtre ledit Nunce, & ce qui a esté par luy executé en ce Royaume; sur les requisitions qui en seront faictes par nos Procureurs generaux, & selon qu'ils verront estre à faire par raison & iustice: Exhortons aussi les Cardinaux, Archeuesques, Euesques & autres Prelats de ce Royaume, d'eux assembler promptement & aduiser à se prouuoir par les voyes de droict, & selon les saincts

Decrets & Canons , contre lesdi-
 ctes Monitions & Censures in-
 deuëment obtenuës & executees,
 & à ce que la discipline Ecclesiasti-
 que ne soit aucunement inter-
 mise , ny les peuples destituez de
 leurs Pasteurs & des saincts mini-
 steres & offices qu'ils doiuent at-
 tendre & receuoir d'eux : à quoy
 ceux desdicts Prelats qui defau-
 dront, comme ils s'accuseront de-
 ferteurs desdites libertez de l'Egli-
 se Gallicane, aussi ils demeureront
 indignes de la iouissance d'icelles
 & de toutes autres. MANDONS
 en outre ausdits Gens tenans nos-
 dictes Cours de Parlement , & à
 tous Baillifs, Seneschaux ou leurs
 Lieutenans & autres nos Officiers
 qu'il appartiendra, que ces presen-
 tes ils facent lire, publier & enregi-

strer; & en ce qu'il escherra execu-
tion, le faire obseruer & entretenir
selon leur forme & teneur. Car tel
est nostre plaisir. EN T E S M O I N
dequoy nous auons faict mettre
nostre seal à cesdictes presentes.
Doné à Mante, le quatriesme iour
de Iuillet, l'an de grace mil cinq
cens quatre vingts & vnze, & de
nostre Regne le deuxiesme. Ainsi
signé, H E N R Y. Et sur le Reply,
Par le Roy estant en son Conseil.
F O R G E T. Et seellé sur double
queüe de cire iaulne.

Arrêt de la Cour
du 4^e de Mars
1511. Sur la lignee
ARRÊST DE LA COUR
DE PARLEMENT.

397

La Cour ordonne que sur le reply
des lettres sera mis, Leuës, publiees & re-
gistrees, oy, & ce requerant le Procu-

reur general du Roy : Et aiant esgard au
 surplus des cōclusions par luy prises. A
 déclaré & declare les Bulles Monito-
 rialles dōnees à Rome le premier iour de
 Mars mil cinq cens quatre vingts ~~ans~~^{une},
 nulles, abusives, seditieuses, damnables,
 pleines d'impietez & impostures, con-
 traires aux saincts Decrets, droicts, frā-
 chises & libertez de l'Eglise Gallicane:
 Ordōne que les coppies seellees du seau de
 Marcilius Landrianus, soubsignees Se-
 stilius Lampinus, seront lacerees par
 l'Exccuteur de la haute iustice, & brus-
 lees en vn feu qui pour cest effect sera
 allumé deuant la grande porte du Pa-
 lais : A faict inhibitions & deffenses,
 sur peine de crime de leze Maiesté à
 tous Prelats, Curez, Vicaires &
 autres Ecclesiastiques d'en publier au-
 cunes coppies, Et à toutes personnes de
 quelque estat, qualité & cōdition qu'elles

soient, d'y obeir, d'en auoir & retenir: A
 déclaré & declare Gregoire soy disant
 Pape, quatorziesme de ce nom, ennemy
 de la paix, de l'union de l'Eglise Catho-
 lique, Apostolique & Romaine, du Roy
 & de son Estat, adherant à la coniura-
 tion d'Espagne & fauteur des Rebelles
 coupable du tres-cruel, tres-inhumain &
 tres-detestable parricide proditoirement
 commis en la personne de Henry troisiè-
 me Roy de tres-heureuse memoire, tres-
 chrestien & tres-catholique: A inhibé
 & deffendu, inhibe & deffend sur sem-
 blable peine, à tous Banquiers, respondre
 ou faire tenir par voye de banque à Ro-
 me, or ny argent pour auoir bulles, proui-
 sions, dispenses & autres expéditions
 quelcōques: & si aucunes sont obtenues,
 aux Iuges, d'y auoir esgard: Ordonne
 la Cour que Marcilius Landrianus
 soy disant Nunce dudit Gregoire, por-
 teur

teur des bulles sera pris au corps &
 amené prisonnier en la conciergerie du
 Palais, pour le proces luy estre faict &
 parfaict. Et si pris & apprehendé ne
 peut estre, adiourné à trois briefts iours,
 au plus prochain lieu de seur accez de la
 ville de Soissons: Enioinct à tous Gou-
 verneurs des villes & Capitaines des
 Chasteaux & places fortes de l'obeis-
 sance du Roy de donner confort & aide
 à l'execution du susdict decret. Et pour
 rendre la sainte & iuste intention du
 Roy notoire à ses subiects, Ordonne que
 coppies collationnees, tant des lettres pa-
 tentes que du present Arrest, seront mises
 & affichees par les carrefours & prin-
 cipalles portes des Eglises de ceste ville,
 Et enuoyees aux Bailliages & Senes-
 chaussees de ce ressort, pour y estre leuës,
 publiees registrees & affichees comme
 dessus: Et aux Archeuesques & Eues-

ques, pour estre par eux notifiees aux Ec-
clesiastiques de leurs dioceses: Enioinct
aux Baillifs & Seneschaux, leurs Lieu-
tenans generaux & particuliers, proce-
der à la publication: et aux substituts
du Procureur general de tenir la main à
l'exécution, informer de contraventions,
& certifier la Cour de leurs diligences,
au mois, sur peine de priuation de leurs
Estats. A Tours en Parlement, le cinq-
iesme Aoust, mil cinq cens quatre vingts
unze, & executé ledict iour de releuee.

Signé, TARDIEV.

EXTRAICT DV PRIVILEGE

D V ROY.

SA Maiefté ayant cōfirmé & authorisé de nou-
 ueau par ses lettres patentes, entant que besoin
 est, la permissiō & Priuilege special & particulier
 que Iamēt Mettayer son Imprimeur & Libraire
 ordinaire, a dés le tēps du feu Roy Henry III. de
 ce nom, son frere, d'heureuse memoire, que Dieu
 absolue, d'imprimer tous ses Edicts, Ordonnan-
 ces & Declarations: Arrests de ses Conseils d'E-
 stat & priué; Arrests, Commissions, Mandemens
 & Expéditions de ses Cours de Parlement & au-
 tres iurisdiccions, Discours, Harangues, Oraisons
 & Remonstrances, &c. Ayant ledict Priuilege
 esté verifié en la Cour de Parlement, & registré es
 registres de la Chambre des Comptes, sadicte
 Maiefté veut & entend qu'il en ioyssē pleinement
 & paisiblement, sans que ores ny à l'aduenir luy
 puisse estre en ce, donné aucun trouble ou empes-
 chement. En conséquence de quoy, sadite Maie-
 sté faiēt defenses tresexpresses à tous Imprimeurs
 & Libraires, d'imprimer, exposer en vente, ny de-
 biter, sans le gré & consentement dudit Met-
 tayer, la Declaration par elle faiēte, cōfirmatifue
 d'autre Declaration par elle mesme faiēte à son
 aduenement à la Couronne, de vouloir mainte-
 nir & conseruer la Religion Catholique, Aposto-
 lique & Romaine: & Arrest de la Cour de Parle-
 ment interuenu sur icelle. Et ce sur les peines &
 amendes portees par lesdictes lettres patentes &

Priuillege, lesquelles fadicte Maiefté veut, entend,
 & commande que ses ainez & feaux Conseillers
 les gens tenans les Cours de Parlement, Baillifs,
 Seneschaux & Preuosts, ou leurs Lieutenans &
 tous ses autres Iusticiers & Officiers, qu'il appar-
 tiendra, fassent chacun endroict soy, garder, entre-
 tenir & obseruer de poinct en poinct, selon leur
 forme & teneur. Faict au Camp de la Guibray le
 deuxiesme iour de Ianuier mil cinq cens quatre
 vingts dix, & de son Regne le premier. Signees
 sur le repley, Par le Roy, Ruzé, & sceelles de cire
 iaune, sur double queüe.

